

## S A N I G N A Z I O R I

1886-GARREN URTEKO ERROMERIYAN.



¡O! gure aita San Ignazio,  
 ¡O! zer soldadu aundiya,  
 ¡O! koitaduben salbatzallea  
 ¡O! santu miragarriya;  
 ¡O! koleraren itzal ederra,  
 ¡O! arbol maitagarriya,  
 ¡O! zer garbiro zenuben gorde  
 Onrazko Euskal-erriya.

Egun batean esan nizuben  
 «Azpeitiaren izarra»,  
 ¿Ote nenguan burutik ongi?  
 ¿Edo zér nuben bestela?  
 ¿Ez alnekiyen izarrak baño  
 Gorago igo ziñala?  
 ¿Ez ote dakit Jaungoikoaren  
 Omen goyena zerala?

¡Arren! ta ¡arren! barka dirazu  
 Utseñ ura mesedez,  
 Zerengatikan ez ninduben ni  
 Zerubak jantzi doayez!  
 Eta bestetik ezereza naiz  
 Itzak neurritzen indarrez,  
 Bañan dizutan amoriyuak  
 Beterik nauka balorez.

Esaten dute etsai batzuben  
 San Ignazio illtzala,  
 Jaunak gizonen fede gaiztoak  
 ¡Arren! onera ditzala;  
 ¿Ildako batek nolatan jarri  
 Bere lurrean itzala,  
 Gure patroyak kolerarekiñ  
 Egiñ ziguben bezala?

¿Ez algenduben, ta ez aldegu  
 Ikusten bizi, bizirik,  
 Jende talderi izugarriyak  
 Izarraitzera bildurik?  
 Ez da, ez, jayo Luzifertarrik  
 ¿Jayoko alda besterik  
 Ignaziori bizi santuba  
 Galduaziko diyonik?

Naiz European ta naiz Afriketan  
 Orobat berriz Asian,  
 Ikusten daude ill eziñikan  
 Balore aundiyanian:  
 Len bezela gaur arkitutzenda  
 Bizirik mundu guztian,  
 Zenbait anima zeruratubaz  
 Lanikan gogorrenian.

Eragozpenak purrukatubaz  
 Badator beti aurrera,  
 Esanaz guri, naiz Ignazio  
 Anziñakoa berbera;  
 Nator euskaldun errietatik  
 Biralitzera kolera,  
 Esan ta egiñ jorra zabaldu  
 Osasunaren bandera!

Zer gozoa dan ume gañsoaz  
 Santu bat kupituztea!  
 ¿Zér atsegiña illtzen ez dana  
 Loyolan idukitzea!  
 ¿Zér milagro da guk Ignazio  
 Benetan adoratzea,  
 Eta aldegun modubarekiñ  
 Koroiyez apaiñdutzea?

Beñ batez entzun izandu niyon  
 Abade gazte bateri,  
 Euskal umantak zeñ ta nor diran  
 Chit ondo dakiyenari:  
*Euskaldunikan euskaldunena*  
 Esaten Ignaziori;  
 Etzuben esan gezurrik baña  
 Ez eta ere geiegi.

¡Bai! egiya da Aitor aundiyak  
 Baditubela umantak,  
 Nola itsasoz ala legorrez  
 Mendiyak beziñ galantak;  
 Bañan guziyak estaltzenditu  
 Ignazioren kopetak,  
 Nola munduba tapa lezaken  
 Egunen batez kometak.

Erroman Leon amairu garren  
 Daukagun Aita Santuba,  
 San Ignazio bedeiñkatutzen  
 Ari da ziñez poztuba;  
 Ondo merezi dubena da ta  
 Portatutzen da justuba,  
 Naiz jarri arren etsai gaiztoa  
 Ernegatzen ta sutuba.

Eta guk berriz Aita aundi au  
 ¿Nola gentzake pagatu  
 Dizkigulako nola etsayak  
 Ala kolera garaitu?  
 Eskerrak eman, ondo lagundu  
 Eta gañera kantatu  
 Naidegula ¡bai! bere fedean  
 Geren bizitza jarraitu.